

萬曆武功錄

清
大
理
府

萬曆武功錄卷之十二

翰林院添註待詔瞿九思著

東三邊

速把亥列傳

速把亥。虎喇哈赤仲子也。嘉靖丙午歲。以三衛故遷徙舊遼陽迤北沙塌之間。於是部泰寧人抄木。花大。把兒都。紅臉孛羅等。引弓之夷萬餘人。頗虓勇。東西到錦義一千五百里。所在皆可直入犯。無險阻。是時大父魁猛。磕惑內羅言。常入我刺梨山。殺邊吏王相。甚至鹵略人。動以三四千數。自是之後。花當之屬。皆

與虎喇哈赤並勃勃著名塞上矣。延引至速把亥世。益慄悍。出入乘纛。張旂志鼓吹。吹掌威策。數數然從。土蠻入海蓋開原。已謀欲自白。土厥入廣寧。又欲自遼河兩岸入瀋陽奉集堡。當是之時。泰寧人果力箇亦叛。新亡抵速把亥。力箇居遼陽久。自弘治時。曾大父恩孛羅那孫恩克魁勒孫等。一十三族來歸降。至力箇凡四世矣。頗知塞上精兵處。速把亥心愛之。用爲鄉導。果克舊市堡。殺我總戎殷尚質。遊擊閻懋官。把總魯仲仁。及軍民四千餘人。先是降夷黃勇。偕范達子。亦提桴鼓。從殷總戎與俱。旣行至塔兒山。軍陷。

兩人遂降速把亥。胡中亡所知名。居月餘。兩人復亡入塞。邊吏問若亡何也。兩人皆言非亡也。不幸爲虜所執。今乘間得亡。亡虜也。邊吏以故益不疑。頃立兩人長蒼頭軍。稟食邊吏。邊吏優遇。往往在諸軍右。久之。總戎佟登新視事。遇兩人稍衰薄。於是勇有後言。以爲吾安能鬱鬱久居人下乎。先是勇與黃台吉女額卜寨。額卜措通。畏誅。歎雲中上谷塞。得傳送遼陽。勇度是時。速把亥昆弟強盛。吾姑依此輩起。卽黃台吉有如一日。欲問我。彼安能越速把亥昆弟而柰我何乎。於是與大哈刺等七人詣抄花營。又不可去。去。

速把亥勇自知前已降亡。今又復降。彼必疑我。乃自謂我必先以塞上兵馬。及地形。爲彼陳說。什一二。夫然後彼知我無復有他腸。此必深信我無疑。不然者。我請以數萬騎。橫行漢塞可乎。頃見速把亥果如所語。壹語連日夜不倦。速把亥大悅。悔相知晚。於是易勇名曰失兒克。而以夷婦孛兒亥室之。因賜之牛馬各四十蹄。橐駝二頭。羊六十。與謀漢勇謝曰。吾幸假此報君於塞上。如何。是時嘉靖四十四年七月也。其九月。卽引速把亥八千餘騎。從鎮安堡略廣寧城。東至青雲臺。會邊吏惡勇亡。捕繫勇家室。就京。勇至。

問家室安在。蒼頭軍小滿兒具如實告。勇低徊者久之。卽略人畜馳出塞。曰：豈以爲我終不能修報乎？其十月。從義州大清堡入王漢屯。行間逢佟將軍。益用宿怨。故挑戰。殺我官兵吳鸞等七十餘人。傷二百餘人。其十一月。引九千餘騎。從平虜堡入瀋陽。其十二月。引一萬餘騎。從遼陽入長勝堡。其明年正月。復入長勝堡。其四月。引八千餘騎。中分軍。以一軍捕伏鎮武堡。以一軍擊邢百戶等臺一十一座。殺我軍四十餘人。已。復與委中。從鎮武西平堡入廣寧東南。已。復以一萬騎入牆嶺。誘我軍。於是備禦苟麒。追逐伏虜。

倉卒起殊疾力。殺苟麒等二百五十餘人。奪驛騎馬四百餘匹。於是大言阿黃勇。旦日下沙嶺。傅家庄。揚揚馳塞上。以示非復前日轅下勇也。而速把亥由此益壯之。乃與勇馬五十騎。牛一百蹄。羊二百角。得進而視兵馬事矣。其九月。引四十餘騎入錦州大勝堡。其十月。從大勝堡入凌河。其十一月。從高台堡入沙河。其明年正月。引二千餘騎。從長靜堡入鞍山。其三月。引一千餘騎。從長定堡入打鶯臺。備禦王承德死之。是歲隆慶元年也。其正月。入長鴨墩。我兵追逐至勾家寨。斬首一級。奪獲馬九頭。其二月。入芍藥溝。追

亡斬首一級。馬二頭。後從瓦子谷入裨將王世祿。鏖戰。斬首二級。後從松樹口走小孤山。祿逐北。斬首二級。其後三月。從柞子溝走崔勝谷。我兵斬首一級。後從石門臺追逐至白塔谷。斬首一級。其四月。朶顏夷卜萬等千餘人。傳箭請入市。於是臺御史魏學曾。御史李叔和。使遊擊郭承恩。詣關市下。撫賞而速把亥。諸部阿某赤等。亦多闕匿於其間。爲通事陳紹先。覺微告承恩。承恩乃使使者捕之。得二百七十六人。頃驗問一百一十六人。又五六營夷也。趨賞之。去。它一切繫獄。必欲獻見黃勇。而後得解免。於是速把亥見

質夷過多。恐有不可諱。漢一日盡置之於理。縱是屬不言。卽異時。余悔將何及乎。廼以二十六日。鄕當勇詣塞。伏漢法。承恩始釋。阿某赤等。撫賞如初。於是上賜制置使劉燾以下金幣有差。其五月。從馬鞍山直走渾河。漢出兵挑戰。斬首四級。奪獲馬一十五騎。我千把總王世忠。孫衍慶。中流矢死之。軍士死四十四人。傷九十二人。馬八十二匹。其六月。入鎮靖堡。守備使陳言。及千夫長趙宋。周之望。追逐至東長嶺。過延佛寺。去邊可二十餘里。多所斬獲。虜亦殺官軍六十三人。馬七十六騎。其七月。速把亥以爲自吾得

勇而所戰必克。殊深悔前日逼我縛勇者。郭將軍也。乃益阻鎮靖堡外邊。冀欲泄逼勇之忿。先是大哈刺等七人未獻。尚質速把亥所知交夷十七人。而速把亥亦虜我臺軍相當。其八月。從古城臺入鎖龍果谷。追逐斬首三級。後從大杵子谷追逐。斬首二級。後從白山衝追逐。斬首四級。後從一堵墻直擣鱸場堡。張能谷。而裨將劉澧。行捕至孤山堡。虎廷谷。斬首四級。旦日復䟽廟家谷。斬首三十級。虜亦射我軍朱天洗等三人。傷孟友等九人。明日復從新臺入光石板溝。我軍斬首一級。餘虜皆走。小駙馬營出邊。止舍臥牛。

山是後廼偕黑孛羅聚黨九千人壁鎮靜堡間遣輕騎數百誘漢兵漢兵亦捕伏聽諸虜諸虜然後稍稍退頃請曰將軍第還我質夷五人我即以臺軍還於是與之九人居八九日又與四人所不遣者厯三人矣速把亥竟誘鎮遠臺通事李世勳王海及臺軍一人而去是時虜中多漢人幸爲我邊吏言此中計欲大舉遲質夷還歸舉矣其九月速把亥黑孛羅復欲入廣寧以車營烽火精候明黑孛羅乃躬馳鎮靜堡裨將杜鏜所叩頭請市賞已索質夷因與之二人其一人繫必李世勳至卽遣不女欺其十月從古城新

臺入我兵追逐至五岔湖斬首二級其十一月從長
溝逐北斬首二級奪獲馬二十九騎其十二月從東
山奔小佃子屯追亡逐北至古河斬首五級其明年
三月虜騎五六千捕伏廣平山廼先使五百餘騎馳
平虜臺拆墻墊壕漢兵追逐至紀家臺斬首二級奪
獲馬四騎已至張堡山斬首二級我兵輕重傷陳文
舉等五十二人其四月復西引炒蠻把都兒東引委
正把兒得大率四五萬聚捨刺塔刺少者四三百騎
多者五六百騎或捕伏鎮靜堡鎮安堡倏忽白雲山
羊山亡常處其五月從鎮安堡古城入我兵以爲大

舉。鏖戰。廼八九十騎也。望見我兵至。盡反踵走。走山塞。頃復以千餘騎從鎮夷堡。韓口臺入。捕伏紅巖子溝。先以十餘騎直走瓦子谷。是時遊擊將軍郭成恩道逢虜。疾力斬捕甚多。其六月。速把亥黑孛羅使六十騎盜邊。頃復以三百騎從分水嶺入。還過北安屯。青石廠。然虜衆漸合。至萬餘矣。鹵我男婦一十二口。牛驢七十六頭。我兵亦斬首一級。奪獲馬二匹。其八月。速把亥復引卜言兀欲犯廣寧錦義之間。廼以九百騎從錦州大福堡入。於是以四百騎。疆刈我田禾。以五百騎走塞。頃之復合營。直走錦州。乘山舉火。

我兵追逐至羅巴子嶺。及一片石臺西女兒山。斬首七級。奪獲馬二十八頭。其九月。六七千騎走謙場。揮汗成雨。將軍李成梁度虜必從大康南。走鍾家堡。乃止壁。於是分布諸將軍。軍袁家屯。紀家屯。高家屯。王謙屯。何智屯。小方家。大方家。戚家。八塔兒。諸堡。頃虜果以二萬餘騎從大康堡。祝青營。三山臺。卸花臺。入邊。復還。是時卜言。反欲報錦州之敗。廼引黃台吉。把兔兒。抄戶兒。都刺兒。那木大。阿信等。二三萬騎。聚義州。凌河。欲大舉。會市夷覺。微以狀告塞上。兵威甚設。皆遁走。其明年正月。速把亥。反青。大會鵬背山。遲炒。

花諸騎決志欲從丁字泊十方寺入我兵疾力復還歸頃以五百餘騎走北腰舖我兵馳赴懿路城鏖戰破之斬首一十一級奪獲馬六十一頭餘虜皆壁黃甸子我兵直擣其壁斬首捕虜七十六級奪獲馬牛羊六百頭器械亡算其明年十一月速把亥委正抄花合兵羊腸河佯言擊土蠻陰欲略河東遼陽於是副總戎趙完以一軍軍遼陽叅將郭成恩以一軍軍虎皮驛備禦安整以一軍軍奉集堡裴承祖以一軍軍鮑家屯柯萬以一軍軍平虜堡齊可以一軍軍一堵墻亡何虜騎從賣酒望墩入我軍並擊大破之斬

酋首把兒太寧公提等首。大率五百八十八級。其八月。臺御史張學顏。微令土蠻捕速把亥。反青。不惜萬金重賞。其明年又二月。速把亥。反青。旁河以爲壘。當是時。酋首佟鎖羅可赤。沈尅你對替等。亦聚兵散羊谷。清河。欲入邊。於是速把亥。躬帥數百餘騎。從長勝堡。棘榆塢入。漢使大將軍出蓮花塢。得胡首虜四十四級。餘黨悉渡河奔逃。我兵亦傷十八人。居八九日。胡騎六百。從靖安口入。漢兵追逐至柳河屯。亡所得。而會塔兒山鳴柳。聲徹四野。復追至將軍廟。已至板場谷。斬佟鎖羅可赤等首一百五十一級。馬一百二

十六騎。虜亦殺我軍三人。馬三十五騎。軍重輕傷一百餘人。自是之後。虜亦殺略我塞下。亡已時。於是使酋首忙子把其三等。告急於王台。台保塞忠虜也。廼執把其三等。劍斬之。其明年春。大將軍李成梁見爲速把亥被敗。長勝堡近漸徙廣寧以北。虜騎羸弱。勢頗可乘。乃微使蒼頭軍孟達子。劉達子等。出鎮安堡。誦虜。我兵出不意。出塞以奪虜氣。而以叅將黑雲龍軍居中。備禦戴冠。攻其右。武舉凌雲。攻其左。遊擊傅廷勳。中軍蘇承勳。掌戰車。其正月。出鎮夷堡。八十里。至皂洞山。其二月。出鎮邊堡。六十里。至亂石山。亡所

得得雜木數萬。其三月出白雲山一百二十余里。至金線塔。會虜騎三百。跳驅走平山。山林深箐。望見漢兵。輒棄馬。捧頭鼠竄入林中。殆如蜚。於是軍中傳令戰車槍手。發火器。烟火相望。斬首六級。奪獲馬二百餘騎。我蒼頭軍于國。李艾等。亦傷二人。馬一十四騎。是歲隆慶壬申也。其明年癸酉三月。速把亥炒花。從山林中。微使零騎。訶漢兵。復欲結黨。察罕兒。犯我鐵嶺。瀋陽已。帥八千餘騎。伏頭林子。先是回鄉人元啞。以其狀告。於是副總戎楊騰。遊擊張延賞。馳曾遲堡。叅將王永祐。遊擊曹簠。馳平定堡。叅將郭夢徵。備禦

蘇國賦。楊謙。柯萬。郭衛民。宿振武。馳鎮西堡。大將軍
李成梁。馳彭家灣。並傳發。虜畏漢兵盛。復遂逃。我兵
勇氣益百倍。追亡逐北。至鷓背山。忽大風從東北起。
雨雪蔽面。賊乃棄旂鼓。復犇入山。我兵斬首捕虜凡
五十七級。奪獲馬二百七頭。器械亡算。是時西虜黃
台吉。大會土蠻入遼陽。備兵使王之弼。兵巡使賀濤。
乃告叅將馬文龍。郭成恩。微使降夷哈卜寨等。訶虜。
而李成梁亦使李平胡。從義州大清堡。出塞二百五
十里。斬首一級。奪獲馬一百騎。其四月。從小夾臺入。
漢兵追至廟兒山。斬首二級。奪獲馬二騎。已復以一

百五十騎入散羊谷。遊擊曹籃追亡。斬首三級。奪獲馬三騎。其五月。胡騎四百從喜鵲窩入。叅將郭夢徵鷹擊。斬首一級。奪獲馬三騎。已。復以四五十騎入犯榆羔臺。追逐。斬首一級。奪獲馬二騎。其六月。以四十餘騎入雙樹臺。漢兵逐擊。斬首一級。奪獲馬九頭。其七月。復犯孤山墩。我兵馳三道河。鏖戰。斬首一十一級。其八月。復欲引卜言兀。堵刺兒。捨勞亥。入廣寧。大小黑山。錦義。以湔雪前羞。乃爲朶顏人伯戶卜墩。覺來告。先是速把亥。結連董忽力。三百餘騎。過灤河。聲欲犯羅文馬蘭之間。是時合虜五枝。財可得三百騎。

而給諫張書奏以爲虜輒大言入漢塞。至易漢也。語在奏疏。其十月以三十餘騎圍新水衝臺。守備馮文翰逐擊。斬首二級。頃虜騎百餘馳青山。漢兵寡弗敵。奪獲胡馬一十七騎。頃以五千騎從汝花一臺入。我兵追逐。斬首一級。其十一月堵刺兒。卜言兀則已合。速把亥漸增至二萬餘矣。於是堵刺兒計欲入錦義。而卜言兀則又欲并略開原遼陽。廼詳言凡吾所欲略。略建州諸夷也。是時灰正亦欲以七千餘騎入廣寧塞。而堵刺兒復馳散刺會土蠻打刺罕。大率三萬餘騎。用此欲橫行遼陽金蓋間。李平湖卽從鎮寧堡。

出塞。至中濼河一百二十餘里。見虜兵皆精勇而還。虜乃以八千騎從汝花一臺。攻八里莊堡。我兵逐北。斬首一級。奪獲馬三騎。橐駝三頭。李成梁乃下令。令爲左右陣。類一二字。已廼誠曰。敢議令。及不如令者。斬。遂決策以十七日子時出兵。虜亦先使所親愛廉得其狀。乃披甲兵吹觱篥。鼓行而前。我乃左右轉鬪。而中將軍李成梁接戰。會平明。火器擊傷頗多。斬卞列赤等首三十三級。奪獲馬五十三騎。橐駝四頭。是日天大寒。雨雪。卒之墮指者十二三。弗可深入。廼還塞。已虜騎從長山臺入。追亡。斬首一級。漢復使蒼頭

軍李得全。訶虜。至亮子河。道逢虜騎五十餘。殊死戰。斬首一級。奪獲馬七十三頭。虜遂伏羊房屯。久之。論家丁李平湖。李得全。哨探功。陞授百戶。其明年正月。謀復犯遼陽。是時速把亥與土蠻。益睥睨薊遼。亡厭時。西自虹螺。歷廣平。直抵遼河。延袤五百餘里。胡騎十餘萬。東可入遼瀋。開原。西可入廣寧。鎮武。南可入金復海蓋。於是給諫蔡汝賢。奏武備當嚴。頗深遠。其三月。速把亥抄花。委正度塞。下農事急。乃縱虜騎數千。誘漢兵。輟耕。頃。漢兵出塞。於是虜中分。以其半東。窺遼瀋。以其半西。襲錦義。亡何。虜騎五六千。急犇平。

虜臺裨將趙禮昌擊破之。斬首二級，奪獲馬五騎。復
追逐至張保山，伏虜並發。我軍以火器火箭疾衝鋒，
斬級甚多。餘黨皆棄旂鼓走。重輕傷陳文舉等五十
三人。其六月，速把亥委正抄花反青，搯勞漢馳土蠻
營。議以秋高入錦義廣寧。河凍，人金復海蓋遼瀋。於
是朶顏人打不哈具得其狀以告。其九月，速把亥戒
諸酋毋盜邊。竅大舉而後可媮快。是時土蠻猶號稱
庸弱乎。給諫李戴度勢必合黨於西虜，乃以書請
留意武備。其十月，入開原，忽轉折而入於河西。其十
一月，比犯錦州，復入大勝堡。漢兵追亡至黃佃子，斬

首二十六級。奪獲馬九十二頭。已復引以兒鄧等欲入大小黑山。開原。鐵嶺。瀋陽之間。頃之。虜騎二萬馳平虜堡。遂至東楊伴溝諸屯。當是時。翟繡裳爲分守使。帥裨將追逐。四面並發。把總白承勳至。王見屯。斬首二級。奪獲馬一十一頭。把總秦得倚至。王大人屯。斬首三級。奪獲馬八頭。壯士李時英至。毛升屯。獲生口一人。馬一頭。遊擊丁倣至。任政屯。斬首一級。奪獲馬七頭。索駝二頭。千總王盛宗至。郭家屯。於是虜半走。半伏壕中。以拒漢兵。漢兵傷一十七人。馬一十九頭。其閏十二月。大會卜言。台周等六萬餘騎於插漢。

腦兒。其明年正月。我兵鏖戰長勇堡。斬首一十二級。奪獲馬三十五頭。其三月。虜騎三萬。欲犯遼瀋海蓋。或欲犯廣寧關。頃之。虜皆執鈎杆。從平虜堡南靜九臺入。是時總戎李成梁備瀋陽。副總戎曹簠及遊擊張志遜。蘇國賦。楊謙。追逐至國公寨。斬首捕虜一十一級。奪獲馬四十八頭。餘黨棄輜重走。漢兵行捕至河溝。河深十餘丈。虜騎盡傾跌。填陷河水。衝壓死者。不下五六千。克塞十餘里。李成梁乘勝提兵悉渡河。射傷二千餘人。會莫。厯取首級一百九十六級。先後大率斬首捕虜二百七級。虜獲馬二百四十七頭。驢

一百九十頭橐駝二百二十頭器械萬餘奪被鹵男婦三百六十七人我兵亡丁喻春等二百六十二人傷丁高宗等三百四十五人於是御史劉臺奏聞

上乃詔曰御史例不報捷只宜查覈功次虛實或地方有應處事宜不妨事後論建今該鎮獲功已及半月督撫並未奏報巡按乃以捷聞俱非事體下大司馬問狀久之速把亥佯爲欵塞因擁衆深入督撫梁夢龍使遊擊陶承誥追逐至邊外斬首四百七十二級奪獲馬牛羊器械亡算於是大司馬譚綸請咨大宗伯行保章擇日祭告郊廟大鴻臚於皇

極門導引使者宣捷。上乃詔曰。朕恭上兩宮徽號。禮成。該鎮再奏竒捷。此實天地祖宗。朕心欽感。

照例宣捷。仍遣官祭告郊廟。以答洪庥。於是加

李成梁太子太保。廕一子錦衣正千戶。世襲。楊兆。張學顏。皆加勲。廕一子太學。他皆賜金錢幣帛有差。其四月。帥伯言大等四千餘騎。佯言略海西。陰欲犯開原。頃之花大欲犯錦義。復引莽惠伯戶。又聲欲犯寧前。廼先以三十餘騎。從大康堡入。漢使遊擊孔東儒。備禦胡鸞。追逐。斬首一級。奪獲馬二騎。其五月。虜騎一千有五百。伏鎮西堡城北。事覺。伏起。皆貫弓執矢。

射我軍。我軍中流矢死者二人。趨奔馳出邊。其六月復入。我軍捕伏鎮靜塞。出不意。斬首十級。奪獲馬二十頭。其七月。速把亥使卜言台周乞兵專難。於是以前二百騎從黑莊窠孤松山入。裨將劉登行捕。斬首三級。奪獲馬三頭。其八月。抄花使夷使迭所略通事竇聰到關。頃之。速把亥椎牛祭旂纛。以爲神。其祐余。余姑遲坤肚兒哈黑石炭。卜言台周委正黃台吉。以兒鄧長兔。煖兔。扯勞亥。彼且至。而吾亦欲入河東開原。瀋陽遼陽矣。頃之。伯朱戶結連專難。以兒鄧欲略寧前。錦義廣寧。而黑石炭亦聚兵養善木。遲速把亥迺

先使虜視河。河水淺則直走遼陽。潘陽開原不則還走廣寧錦義。當是時長昂土蠻亦大會諸虜哈麻母林欲入塞而朶顏酋長莽惠使夷使送所鹵通事陸偉到邊。具知其狀。於是制置使楊兆都御史張學顏及給諫裴應章皆後先奏聞。其明年正月虜縱三十餘騎馳慕山營。略軍人陳麻子。及道上行人。漢使裨將馬文龍追逐至雙營城。斬首五級。奪獲陳麻子等五人。馬五騎。虜亦射我軍馬得功等九人。馬七騎。頃之備禦王守道從長勇堡馬門出邊。行捕至爛蒲河六十餘里。逢虜騎三四十。挑戰傷我軍曹奎等七

人馬一騎。我軍亦斬首五級。奪獲馬四騎。其二月。副
總戎曹簋及分巡使蔡可教。使使者王俊從長寧堡
出邊。行至夾灘五六里。虜以二十餘騎襲我。漢復使
遊擊蘇國賦備禦馬衛都。馳袋兒灣。因至菱角泊。擊
破之。斬首一級。奪獲馬牛二頭。餘黨悉逐逃。追亡至
高麗窩。斬首三級。奪獲馬牛七頭。已至死河淺。轉戰。
斬首二級。奪獲馬牛九頭。我軍亦傷杜永功等九人。
馬五騎。其九月。速把亥引哈屯。韋正。反青等。二萬餘
騎屯遼河。欲入開原。潘陽會邊備嚴。遂殺略王台畜
產。焚燒數寨而去。是時。朶顏酋長專難。董狐狸。兀魯

伯戶亦入寧錦。於是臺御史張學顏總戎李成梁上書。大略慮遼河爲適中之路。有如一。日東犯開瀋。則有肘腋之虞。南入廣寧。則爲腹心之災。西略義錦。則阻咽喉之路。居頃之。煖兔。董狐狸入義州。大定堡。漢使裨將馬文龍追逐。斬首二級。奪獲馬二十二頭。其十月。速把亥。土蠻聚精兵三萬。皆東行。於是副總戎曹簞急使裨將姚大節。徐維忠。徐永昌。凌雲。分屯瀋陽。頃之。虜騎從黑林墩入。直走靖安。清水河。略王台。由廣順關故道還歸。縱火焚燒道上。芻芟略畜產而去。已。復以二千餘騎入開原。威遠堡。小河口。臺。台廼

使元堵岡告急於漢。篋卽帥備禦唐朴。鏖戰破之。斬首三十餘級。餘黨悉出邊。是時臺御史張學顏總戎李成梁傳檄土蠻。腦毛大速把亥。然虜騎皆大言。吾欲略廣寧錦義。然後已。於是裨將馬文龍備凌河堡。劉翊元備馬家屯。虜竟從墓山臺走。走井土臺。我兵追至蔡家臺。多所斬獲。其十一月。虜騎二萬餘。從寬邦。直擣戴家嶺。黃伯河。黑土臺。分三枝。一枝奔沙河驛。一枝奔雙墩舖。一枝奔中後所。遊擊王國瑞追逐至沙河驛。營盤山。斬首一級。奪獲馬一騎。王大璋馳石河舖。奪獲馬二騎。虜亦傷我軍七人。殺王奉等四

人馬五騎。頃合戰中後所西亂岡臺。殺我蒼頭軍葉國用。徐文。徐世忠等一十一人。亡何。復從新興營。蒞子溝。走東關驛。塔兒嶺深至曲尺河。舖漢大出兵轉戰。斬首二級。奪獲馬四騎。自是之後。速把亥引莽骨大莽骨能哈不慎。萬餘騎聲欲略遼陽。於是臺御史張學顏慮中後所地勢平漫。而沙河驛東關驛。又嘉靖中已陷之城。欲加兵防守。其明年正月。虜益旁近邊塞。其二月入海州東勝堡。已入前屯瑞星堡。止壁舊遼陽。大將軍李成梁度虜此必誘兵。以爲我兵必西防。彼迺東馳。乘我所不虞。必無疑。於是發遊擊裴

永勳馳寧前而以秦得倚。協守遼瀋。是時備禦楊四德使使者于現等七人。巡徼雕背山道。逢三十餘騎。殺戮殆盡。頃虜騎二百。從鎮西堡靖虜墩入。射死蒼頭軍三人。馬二騎已。復入寧遠。殺官兵一十七人。其三月虜縱二十餘騎入宋家泊。略牛六頭。軍一人而去。頃復以三百騎捕伏鎮西堡。賴武備嚴。馳還。於是大將軍李成梁決筴襲大營。廼以李成材。李如松。李如栢爲一軍。王維貞。劉登泰。禿萬春。郎梅。蕭汝芝爲一軍。而成梁及曹簠。楊燮。王永祐。蔣國泰。戴良棟。常春。馮文弼。楊四德。霍九臯爲一軍。皆屬傅廷勳。姚天

與徐維忠徐永昌掌之。期十五夜出邊。行至中遼河。北羅兔一百餘里。天明去虜營漸近。軍中砲鳴如雷。虜衆倉卒見漢兵。如自天而下。大驚。自相蹂踐死者。及赴河溺死。亡莫。斬阿都奈把吉等首。凡五十二級。我兵亦傷丁朱沛等三十八人。馬二十一騎。是時成梁見爲地。濘樹稠。於深入不便。趨罷兵。成梁殿後。行緩。頃之夜。不收。劉友升以二十人從代子河北團灣兒。出邊四十餘里。因捕伏爛蒲河。鏖戰。斬首二級。奪獲馬一騎。虜亦殺我軍一人。馬一騎。相當。其四月。速把亥偕土蠻打來罕。黑石炭。及青拱兔。煖兔。以兒鄧。

欲請比宣大貢市。往廣寧款塞。以爲歲遺。我繒絮米
藥則已。不遺我而廼云謝絕。則我以數萬騎馳蹂廼
稼穡也。於是李成梁躬帥親兵李如松。李永才出邊。
旣行至西寧堡。而御史趙允升方行部宿堡中。聞虜
倣卽臨兵。趨李成梁親兵李成材。李如松。如栢。如桂。
如梧。疾力戰。而虜騎則已分爲三枝。一枝馳內邊。一
枝馳路壕。皆張旂志。鳴砲。勢頗盛。於是如松尾虜騎
還入塞。挑戰。斬苦力得等首五級。奪獲馬三十四頭。
漢兵亦多敗北。會裨將李澄清。陳朝升救兵至。虜始
犇舊路。從珠子河出邊。頃之。虜騎二千從公山堡。麻

溝臺直擣連山驛成梁亟馳雙樹舖虜騎方壁灰山
接火臺舉火益逼近連山驛於是遊擊孔東儒亦馳
皂隸山虜見漢兵疾力皆遂走我兵斬首一級奪獲
馬一騎是後太僕張世胤備兵使李松使使者微行
詢青山口義院口土蠻方牽馬至哈刺毋林老河欲
疆廣寧開市如故已度不可得遣長兔長昂西犯寧
前遣東嗾反青哈屯速把亥犯瀋陽鐵嶺先是御史
趙允升劾奏虜數入興水小團山白塔谷仙靈寺已
復東入連山西入寧遠南入海圻殺略人畜亡算
上有詔言西寧堡之捷撫按奏報不同御史親與賊

遇其言必實。下大司馬問狀。其五月，兩入錦州廣寧。索貢市，不從。其九月，復使莽惠馳鎮靜堡。語在土蠻傳。其十一月，復使速把亥入海州。旦日，卽出邊。略大康堡軍夜于朝。其十月，略大興堡軍張仲禮等四人。已略大福堡軍韓用。已略胡孜等八人。已入中前所。略大福堡軍李祿。已略大定堡軍王得功。已又使長昂入前屯。已略大定堡軍李思功。已略開原軍李進羔等七人。民蕭志學等十一人。其明年正月，與黑石炭、反青、炒花等，復聚捨刺母林。語在王台傳。頃之，速把亥縱部曲犯開原、遼瀋、廣寧諸邊。而土蠻亦移師。

遼河劈山劈山乃在開原遼陽間也於是李成梁以
十七馳瀋陽旦日至丁字泊虜乃以數百騎繞墻而
入成梁躬率車騎追逐直擣劈山去邊已二百餘里
漢出火器弓矢挑戰擊破之斬阿丑哈等首凡四百
三十五級奪獲馬四百七十頭橐駝二十二頭器械
鎗刀亡算虜殺我軍佟尚仁一人傷秦得倚等二百
五十九人馬一百四十五騎於是制置使楊兆及都
御史張學顏奏捷大宗伯乃移咨太史爲文太常
治祭品遣告郊廟而會五月初十爲高皇帝忌
辰於是以初九日宣捷十一日請上御門公卿行

武攻錄
慶賀禮

賜李成梁以下爵賞金錢幣帛有差是時

上有詔言朕方行嘉禮有此大捷實

天地祖

宗默祐朕心深切感仰着遣官祭告

郊廟以答洪

庥已

賜大學士張居正呂調陽申時行廕賞皆以

書辭

上乃詔曰該鎮大捷實卿等運籌之功陞廕

非濫既懇辭朕勉從賜元輔銀一百彩段六表裡次

二輔各八十四表裡以示褒嘉其十一月速把亥入

河東其十二月引炒花煖太老撒卜兒亥恍惚太壁

遼河李成梁復躬帥車騎馳養善木直擣圓山斬首

捕虜大率八百八十二級奪獲馬牛羊器械亡算先

是虜以二萬騎從東昌堡亂柴口。深至耀州。李成梁先使百金之士捕伏海州。出不意斬首二級。奪獲馬一十五騎。故事各邊獲功奏捷。俱先議賞賚其陞廕。候勘明行。於是制置使梁夢龍及都御史周咏奏捷。皆請比先朝劉江之封廣寧伯。以倭首七百級。曹義之封豐潤伯。施聚焦禮之封懷柔伯。東寧伯亦不過以首虜四五百級。而况成梁先時擊破逆梟。斬首捕虜至一千二百餘級。今北虜一級已足倍東虜。宜加封爵。於是大司馬方逢時請咨大宗伯擇日。大鴻臚導引使者至御前宣捷。上有詔言該鎮屢獲

武功錄
郊廟用答神庥時戊寅

奇功朕心加悅依擬奏告正月也。上特諭內閣。昨日遼東捷報非常。卽奏聞。

聖母蒙面諭朕云。賴天地祖宗默祐。此時正

爾嘉禮之際。有此大捷。乃國家之慶。我心甚喜。元

輔運籌廟謨。二輔同心協贊。纔得建此奇功。我勉留

張先生。這是明效。朕恭對云。聖母慈諭的是。茲恭

述以示先生等知。一應叙錄。宜從優厚。用稱朕拳拳

仰體。聖母至意。頃復有詔。詔內閣。昨見遼東塘

報。大捷比前次更多。朕心深喜。今日奏聞。聖母歡

悅殊甚。朕冲年踐昨。恒念德不足以格天。威不能懼

虜酋夙夜惕勵而邊臣奮勇屢立非常奇功誠如

聖母前諭 天地 祖宗默祐乃國家之慶元輔平

日加意運籌卿等同心協贊之所致也部䟽上時卿等以此諭內閣着兵部馬上差人星夜前去與張先生看將一應叙錄比前更優厚用示惓惓獎酬之意久之賜李成梁兼太子太保廕一子指揮使楊兆應一子百戶張學顏廕子陞一級皆世世勿絕金錢幣帛有差陞賀濤一級姚天與二級他金錢有差復以馬價二萬賚將校有功者賜本兵方逢時銀五十兩表裡四之廕一子太學陞曾省吾邵光先一級金三

武
十兩。表裡二之。所司郎中皆陞俸一級。金十兩。餘皆
八兩。賜梁夢龍金四十兩。周詠金三十兩。表裡皆二
之。後以梁夢龍奏復賜爵賞金錢幣帛有差。先是保
章擇巳卯正月二十二日辰時告廟。巳時宣捷。遣
公張溶告南郊。伯楊炳告北郊。公徐文壁告

太廟。如禮。巳。賜陞奏捷舍人崔勵等秩。衣服二套。

居五月。封李成梁寧遠伯。歲食祿米八百石。巳。給

誥命及鐵契。得免死。遷梁夢龍俸一級。廕一子太學。
周詠復御史右丞。遷秩一等。遷張崇功唐朴秩一級。
明年九月。土蠻遣速把亥略遼瀋開原。巳。聚兵四萬

好村祭旂纛卽馳磕力。其十月虜騎五萬欲略遼遠前屯衛不則攻山海關。於是臺御史張夢鯉因郵置以聞。其十二月移壁遼河。聲欲犯海州。其明年正月速把亥復引炒花煖兔伯言以兒鄧謀欲略瀋陽。其四月聲欲略遼瀋。其七月與黑石炭聚五萬騎哈亥惡卜各素議期八日馳捨喇毋林。聲欲馳廣寧迤西山海迤東間。其九月虜騎六萬從慶雲堡謝海臺直走中固城馬家寨。已入鐵嶺東南熊官兒多所殺略賴漢兵追逐還走殷家莊平嶺山頭臺出邊。是時土蠻亦欲犯錦義右屯。速把亥乃乘隙復聲欲犯薊

之灤東遼之河西。其十二月聚兵遼河。又聲欲略遼
瀋。其明年正月。上有特詔。詔內閣。今日風氣不祥。
恐有邊事。與先生等說。宜申飭邊臣。加意做備。居頃
之虜騎入湯河堡。旋退。裨將周之望追逐至羊兒山。
斬首二級。後復以二千騎從大鎮堡。長山。深入錦州
城。於是虜衆漸聚會。固已至二萬餘矣。漢使裨將馬
如龍去邊。既行八十餘里。捕伏水獺河。虜以一萬奔
杏山。一萬分馳錦州四門。周之望殊疾力戰。斬首四
級。奪獲馬二十一騎。已復與王應榮等鏖戰。各劍斬
數賊。會矢盡力乏。兩人竟死於兵。是時遊擊徐恩指

揮鄭產出北門。裨將趙宥。指揮王汲。張朝臣。出東門。金鼓震天地。虜乃奔小凌河。小凌伏起。涂寬斬首三級。奪獲馬十三頭。高橋舖伏起。千總高良弼。斬首二級。奪獲馬四頭。杏山驛伏起。千總朱延慶。斬首二級。奪獲馬三頭。其三月。速把亥倚遼河。以爲險。將軍李成梁。大戰。斬首捕虜三百四十三級。奪獲馬四百三十匹。盔甲八百有奇。乃以十六日。宣捷。因祭告。

郊廟。賜成梁以下金錢幣帛有差。其四月。虜騎一萬從孫真臺入。副總戎曹簠追逐。斬首四級。奪獲馬二十騎。復至土臺。被虜圍急。賴裨將蔣位。孫守廉母承。

宣救得潰圍出虜復馳漢塞蒼頭軍丁援斬首一級
奪獲馬二頭千總陳鵬把總潘汝戢及親兵曹義等
死者三百有六十人輕重傷一百有六十六人馬四
百有八十六騎已復以三萬騎聲欲略遼瀋開原其
七月虜以十餘騎從沙塌臺入我兵斬首一級奪獲
馬三匹已復奔矮嶺斬首一級奪被鹵男子一口馬
三頭其十月虜騎二十餘從那木川入把總胥仲仁
追至韭菜窰斬首一級奪獲馬一騎頃之虜大入鎮
安鎮靖攻圍山堡盤山驛十三山驛殺略義州我兵
斬首捕虜凡一十八級奪獲馬橐駝四十七頭虜亦

鹵我軍馮惠等六人。傷張勳等五十二人。奪糗糧二千一百八石。燒毀廟宇二座。旦日復從大清大靜堡出邊。是時李成梁度虜入。秋毫亡所利。必且復入。乃選輕銳之卒尾虜後。得亡恙。其十二月。虜以三十騎從寧遠堡。鶯窩臺入。我兵追至媒婆溝。斬首二級。奪獲馬四匹。其明年四月。虜四十餘騎從代子河。墊深入。我兵追逐大林子。斬首五級。其三月。虜騎七八十。從鎮西堡入。我兵斬首一級。已。復從木空臺。追逐。斬首一級。已。追亡至盤嶺溝。斬首一級。已。從鎮北堡。安寧臺入。我兵追亡至狝狗石門。斬首三級。自是之後。

速把亥使班字束及那亥爾只額捕伏塞上聽漢師擊羊令男把秃兒伯言顧馳清細河已使他刺亥大力紅傳箭到關欲買賣而速把亥亦躬帥二千餘騎詣鎮夷堡大將軍李成梁乃提叅將李平胡等兵鏖戰平胡射最工乃貫弓執矢鄉速把亥遂中左脇墜馬蒼頭軍李有名亟割首級是時秦有功亦斬河木寨宋尚仁斬卜兒女皆有名渠卒也餘黨悉奔秦得倚乃從大清堡出追造一夜馳大青山去邊一百二十里李寧斬首五級子有華生得額孫兔一人於是速把亥弟炒花及姪老撒卜兒愛皆去帽頂冠孝老小

盡兒啼。謀欲藉兵於土蠻以報怨。而其妻哈屯妹夫
花大。卽裹屍到營。以布殮。葬塔母戶渡下。因治房子。
率其酋長九家。家一人守冢。頃之。把兔兒至。諸酋東
西瞭山。把兔兒乃告曰。我卽有如有不可知。卽舉烟。
若卽蚤自來也。是歲萬曆壬午也。於是制置使吳允

臺御史周詠。總戎李成梁。皆後先以捷奏。先是御

史馬允登訪誅納。長昂及西虜打兒漢。漢親速把亥
姑翁也。皆言速把亥伏誅有狀。是時王台夷使札卜
失言亦如之。於是大司馬梁夢龍請咨大宗伯行保
章。擇吉日祭告郊廟。大鴻臚導引使者至御

前宣捷如故事。自是之後。大司馬論功行賞。而輔臣大司農。及給諫陳謨。御史皆以例不及論。論制置使臣吳允。御史右丞臣周詠。寧遠伯臣李成梁。當特議副總戎臣秦得倚。叅將臣王維貞。臣熊朝臣。臣李平。胡。臣李得全。臣孫守廉。遊擊臣蘇國賦。臣蔣位。中軍臣李宗召。當陞賞。備禦臣李興。臣李塗寬。臣詹承祖。旂鼓臣孟學詩。千總臣唐伯美。臣張世爵。臣岳高。臣胡尚忠。備禦臣朱延慶。安。當陞賞。遊擊臣楊士觀。把總臣毋承宣。當量賞。兵備臣周于德。臣李松。臣靖四方。分守臣張崇。苑馬臣洪濟遠。當上賞。副總臣徐

技。叅將臣羅思聰。通判臣蔣思極。知州臣張指南。遊擊臣周思忠。守備臣李如梧。王有翼。備禦臣張箴。臣房承祖。臣金鳳來。臣李應時。把總臣胥仲仁。當量賞。是役也。首功雖出李有名。而中傷實李平。胡當應。并論。乃議遷平。胡都督僉事。仍加副總戎秩。有名授正千戶。俾世世勿絕。於是。上有詔。賜李成梁金一百兩。大紅紵絲蟒衣一襲。復賜第宅一區於京師。下大司空。蓋道。廕子爲指揮。世襲。遷吳允。大司馬兼御史左丞。陞周詠。俸一級。皆廕一子。錦衣百戶。世襲。賜勅獎勵。金錢幣帛有差。遷李平。胡秩三級。秦得倚。

等二級。李寧等一級。賜周于德等金二十。王維貞等十五兩。李松等十兩。徐枝等八兩。重賞李有名。發馬價一萬。犒諸校有功勞者。賜梁夢龍金五十兩。表裏四之。廕子得世襲。陞王一鶚。張佳胤。俸一級。銀三十兩。表裏二之。陞所司郎中一級。銀十兩。他皆一兩。先是劈山之捷。給諫光懋。以爲實土蠻部阿丑哈。一日以盜牛馬故。懼誅。群輩千餘人。亡抵漢塞。遊擊陶承馨誘而僇之。至上功幕府。凡四百有奇。其後大司馬方逢時。按御史安九域議。奏對。詔制置使梁夢龍。臺御史周詠。總戎李成梁。准辭免。原加恩典。陶承馨

下御史逮問翟繡裳。馬衛都王有臣皆免官。速把亥一名速卜亥。一名蘇把亥。爲泰寧衛酋長。生四男。長卜言兔。又名栢彥務。次卜言把都兒。又名把兔兒。次卜谷。次勺里兔。又名召里兔。始速把亥伏歐刀死。尚披戴盔甲臂手。漢使降夷長漢往驗級。級大如斗也。

讚曰

以余所聞遼左東起開原西抵錦義大率千五百里。乃所在皆可入犯乎。嘉隆以來虜患何歲亡之。甚至殺大將軍如艾草管甚哉。速把亥之爲禍首也。而果力箇黃勇實有以導之。然兩人亦旋受其咎。酷矣。道

家之言。毋爲戎首。豈虛語哉。劈山之捷。說者尚有後言。不然。諸將軍且與驃騎爭烈矣。古者封爵之誓曰。使黃河如帶。泰山若礪。國以永存。爰及苗裔。凡爲將願方此意哉。願方此意哉。

卜言兔卜言把都兒列傳

卜言兔速把亥長男也。又名栢彥務始速把亥妻哈屯生四子。長卜言兔。次卜言把都兒。次卜谷。次勺里兔。於是昆弟相率而報先人之怨。曰非得東西虜莫可者。當是時把兔兒則有叔父抄花妹夫花大黨之。皆藉藉有威望。胡虜聞而獨卜言兔勺里兔亡所知名。兩人由此思柔顏有長昂之會。西虜有打來明暗之會。東虜有火羅赤之會。皆夙夕以阿父故頗有積怨。深怒於廣寧。於是從之而起也。而會龍兔伯言瓜兒兔。以兒鄧額叅委正。大小打刺漢委正黃台吉亦

欲入開原廣寧東西廼聚黨數萬人。期五月十三日。撲捉瀋陽靜遠堡。於是遊擊韓元功馳救。居一二日。元功使把總陳九疇。黎文重。出威遠臺。訶諸虜。虜乃馳三千騎。吹掌海螺。張旂志。舉火鳴砲。送奉馬牛羊入堡。元功急使章渙然。堅壁城守。卽躬提兵挑戰。是日自寅至巳。勇氣益倍前。亡倦。虜騎漸增。元功兵大率減什二三。寡弗當。竟被金夷死。我兵徐永福等死者凡三十二人。馬凡一百五十九騎。傷凡三十人。自是之後。復以五萬騎牧馬遼河以西岸。謀欲略遼陽西古城。諜者覺。具以實告。於是傳分守使。及備禦使。

何應魁提裨將羅維冕備古城。先是四月二十二日，中貴人張誠於會極門傳奉特旨，昨日風霾陡作，塵沙蔽日，朕心驚惕，靈臺來奏，主有邊兵，着兵部便馬上差人傳與薊遼等處督撫總兵等官，慎加防備，毋得踈懈。居亡何，備燕河路者將徐從義以長昂做告，備臺頭路者將解一清以栢彥務勾里兔做告，備石塘路者將羅思聰以打來明暗做告。是時東虜銀燈大委正，把兔兒召里兔方擁精兵二萬在養善木臺，御史李松與大將軍李成梁度把兔兒等必窺河東，乃令深溝固壘，以待諸虜騎。一日卒然不可知。

是歲萬曆乙酉也。其二月，虜以萬騎犯蒲瀋。其三月，我兵先伐其謀，得亡虜。其五月，虜騎犯十方寺。已，犯長勝堡。於是暑草漸茂，猶虜日驕橫，志未嘗不在大逞。賴渾河河深不可渡，竟還歸。此豈非天所以限南北哉。已，西虜二百騎，又犯錦川營。遊擊祖承訓、鏖戰，斬首八級。自是之後，制置使張佳胤乃上書稱副總戎臣楊燮、臣李平胡、叅將臣孫守廉、臣李興功、叅將臣劉言、遊擊臣章應選、備禦臣張世爵、臣霍九臯、指揮臣王紹芳、臣吳希漢有邊才。上有詔優恤韓元功。當是時，勺里兔尤從土蠻哉。土蠻欲略河東、遼陽。

以報速把亥之役。會十有一月大水。勾里兔乃巡視三岔河水。水深。輒報曰。水堅可渡。

卜言把都兒。速把亥仲子也。又名把兔兒。隆慶初。黃台吉以昆弟六人顯。卜言把都兒以昆弟四人顯。四人皆逐牧哈亥額力素水草。然四人中莫有強於卜言把都兒者矣。由此兩人相爲引重。志未嘗須臾忘錦義。是時卜言兀亦欲報宿怨。於是大會卜言把都兒及黃台吉抄戶兒都刺兒那木大阿信等三萬餘騎。謀入白錦義。賴塞上燧火精明。並馳還。久之。速把亥常椎牛。遣卜言把都兒往清細河。而會速把亥伏

誅。上言把兔兒卽推擇會長二十人。馳塔母戶渡視
父冢。諸酋乃東西山瞭漢兵。上言把都兒好謂曰。有
如不可知。我卽舉烟火。若蚤自來也。是時往來者言
胡中皆以速把亥旣物子少。諸酋皆欲從瓜兒兔奪
開原。而不知上言把都兒已能枕戈泣血矣。先是王
畧男阿台聚黨爲其父復仇。一旦聞上言把都兒發
難。大喜。卽從馬上傳花大炒花。諸酋趨會兵。馳遼瀋。
海州廣寧凡吾等所爲報先人之怨。令旣下。所不亟
上馬旣窺左足而應者。酋長罰馬一百騎。橐駝五十
頭。部曲馬八蹄。牛八角。於是把都兒卽引莽官大莽

骨塞。從專難營藉助兵。時癸未正月也。其四月分道入長勇堡。已遂與花大炒花大會。老撒等牧馬遼河。已入清細河東西擊城堡。漢益發兵備鎮寧鎮遠鎮安。鎮邊鎮夷團山諸堡。虜乃復馳臥牛山。裨將李仲武。尹世威使使者捕伏山後。於是平山東頭亂石山虜車煩馬怒。夜半常聞蛩蛩如恐弗克也者。旦日虜縱五萬騎直擣缸窰空臺。虜我軍六人馬六騎。殺八人。賴援兵至。於是李得全等斬首一級。奪獲馬二騎。餘黨悉遁。逃出邊。頃之。臺御史周詠度虜必復入。急使裨將李平胡。孫守廉等備正安堡。因捕伏三角山。

虜果擊鎮靜堡得全。廼出輕銳之卒六百人衝鋒會暮。卽鳴砲舉火。令返兵。旦日復出輕車甲騎夾攻虜。竟奔鎮遠關。於是三分虜。以其半圍東小台。缸窞空暗馬山。諸台以其半止壁。缸窞空南嶺。以其半圍本堡。守備李仲武乃出弓矢鎗砲火箭如雷電。虜騎稍奔。倭南駕砲山。頃之復攻本堡東北面。仲武殊疾力如故。虜亦復退。頃攻圍門台。然每戰至日晡。虜輒環列馬門關。以絕哨卒往來。令不得馳報。是夜窺虜暫退。乃使蒼頭軍楊洪等五人下臺取火藥。虜覺卽馳圍擊破燉臺。殺略我軍隳二。等一十三人。卽移騎攻

前台及後光山台得全見圍困急躬恃鬪器衝鋒伏虜並起轉戰皆無所得日晡得全復出堡挑戰虜見鎮撫使親臨兵兵威甚盛稍退舍於是得被鹵許千加龍承道等九人斬首一級奪獲馬三騎我兵傷高文舉等八人馬十騎是時東小臺缸窰空瞭馬山諸軍見鎮遠關臺被克多遠逃道逢伏虜鹵林雪二等六人馬六匹殺吳效忠等八人先是黃台吉使使者款鎮靜塞索增撫賞不可得其後五月十二日復引五萬餘騎突攻鎮靜堡於是分巡使任天祚請於臺御史李松因與總戎李成梁議議於大小黑山大出

兵詳爲北伐。微使百金之士捕伏以撓東顧。是夜遣裨將李得全等馳鎮靜堡以爲內應。旦日臺御史及總戎親臨兵遊擊李寧以刀擊花大傷左臉。復貫弓射流矢中膊脛。花大親上言把都兒私也。虜營皆大哭。失聲盡捧頭鼠竄而去。於是制置使周詠奏聞。後以阿台捷并行賞。語在阿台傳。其六月十二日偕董狐狸。噤金兒三萬餘騎犯遼陽廣寧。會大風飛砂石蔽面。晝晦。頃之雷電交作。驟雨如注。平地水深數尺。大靜大寧城傾頽者五十餘丈。傷大寧廬舍尤甚。於是軍民盡徙大寧。是日叅將熊朝臣亦引兵至。廼

使夜不收劉志孝以旦日五鼓鷄鳴出邊。既行至大里山。可五十里。虜騎五千直走大邊。正北臺舉火鳴砲。分爲三枝。一枝攻大靜堡。一枝攻大寧堡。一枝伏姜家山溝中。是時副總戎李平胡及遊擊李寧千總秦得貴備禦朱延慶設伏鎮夷堡。倉卒見虜至。皆誓捐軀不顧。一生急砍入大靜堡。殊疾力。虜始棄臨衝還歸。獨大寧以堡官端世武中流矢死。虜騎得循墻而入。於是叅將熊朝臣把總李義引兵馳正義莊溝中。伏虜起。接戰殺軍民趙得功等一百二十三人。馬八騎。牛驢十二頭。焚廬舍二十六所。李平胡等復馳。

救虜望見李將軍馬上奮髯而來皆失魄虜始遂走
盡出塞其後給諫張鼎思劾奏其事語在奏疏其
後年正月把兔兒并花大抄花老撒卜兒亥止壁遼
河已大會養善木謀欲略遼瀋海州其六月引著影
兔等犯清細河是時把兔兒徃徃群輩逐水草興中
興中去大寧爲近比肩錦義南可跨寧前西可薄古
北東可距舊遼陽也其明年二月速兔兒引瓜兒兔
叉哈兒老思卜兒亥脫退脫卜戶馳十方寺頃之復
結連西虜以兒鄧萬餘騎直抵蒲瀋擊城堡殺略軍
民遊擊周思孝追逐出塞於是逐水草遼河河深虜

騎不能渡。大將軍李成梁卽徵遊擊韓元功調集船板繩索。赴丁字泊堡。治浮橋出虜。不意是時制置使李松偕分巡使任天祚備兵使王緘亦親臨兵監軍。而以副使劉易從備附關。備禦使童應選備鎮城民部郎趙三聘轉餉。期十七日皆從丁字泊堡出邊。成梁迺布陣爲一二二字。迺以一字陣衝鋒。二字陣接踵繼入。敢議令及不如令者斬。旦日寅時遂至打大去邊一百五十里矣。虜已先覺。望見漢兵至。皆跳驅挑戰。於是李成梁躬帥一字陣。以火器火箭刀槍弓矢並發。制置使在行間。趨二字陣。鼓行而前。虜乃股栗。

不勝兵。漢兵乘勝，勇氣益百倍。疾力戰，斬首捕虜凡八百二十四級。得名酋捨征孛來，乞搭把失等首。凡一十三級。奪獲被虜凡一口馬。凡五百四十九騎。盔甲臂手以千數。亡降夷羊羔兒、卜兒寨等。凡十人。傷軍丁徐用謙。凡二百一十六人。死張倉等。凡六百三十九騎。旦日遂鳴金班師。自是之後，把兔兒常聲欲犯廣寧。福餘人杪賴、胡蘆常從、煖兔伯言所得其情來告。自是之後，東虜一克灰正。及打亥灰正、黃台王、銀燈、短弓兒皆後先欲犯寧遠。寧前及遼陽迤西、廣寧迤東、黃泥窪、鞦韆城有狀。上方有特詔。昨日風霾。

大作邊境恐有虜倣。兵部便馬上差人傳與薊遼等處督撫總兵官嚴加防備。毋得踈懈。時乙酉三月初七日也。亡何臺御史張佳胤以捷因郵置聞。事下大司馬張學顏問狀。於是案臺史疏本大學士申時行許國王家屏運籌帷幄功。顧以法不及論。乃論臣張佳胤。臣李松當優異。臣李成梁當特加優異。臣任天祚。臣王緘當超擢。臣劉易從。臣趙三聘。臣章應選。臣張爝當賞賚。臣唐伯美。臣李如梧。臣胡鸞。臣胡尚忠。臣宿振武。臣王維貞。臣孫守廉。臣周思忠。臣李宗召。臣裴承勳。臣佟養臣。臣姚大節。臣熊朝臣。臣郭夢徵。

臣查大受。臣李應時。當陞賞。臣李平胡。臣李寧。臣李
興。臣李芹。臣劉言。臣李維藩。當陞賞。臣劉易從。臣趙
三聘。臣章應選。臣塗廣。臣黃應魁。臣陸尚學。臣高貞。
臣張朝臣。臣蔣國太。臣崔吉。臣霍九臯。臣何繼祖。臣
郎維忠。臣劉秉節。臣暮承勲。臣劉仲文。臣董文貴。當
陞賞。臣郎梅。臣李日增。臣韓元功。臣涂寬。臣史儒法。
當左遷。請以功贖。臣張玠。臣毋承宣。臣張國忠。臣雷
應坤。臣葛逢夏。臣朱文瀚。臣喬官。臣熊鑰。臣徐行謙。
臣施國臣。臣高良弼。臣楊四維。臣吳希臣。臣黑雲鳳。
臣芳。臣趙相。臣施應魁。臣羅繼冕。臣鄭應時。臣

陳文德。臣李祿。臣李有名。臣李有華。臣趙國禎。臣蓋
邦奇。臣審國胤。臣李開光。臣高世武。臣張爵。臣彭國
珍。臣宿振文。臣金本健。臣王汝徵。臣佟應詔。臣申克
寬。臣裴邦翰。臣李尚仁。臣黃承恩。臣金尚禮。臣馮文
用。臣張光先。臣佟守位。臣尚大用。臣黃卿。臣張繼宗。
臣趙光祖。臣趙世臣。臣盧得功。臣張承祖。臣何九州。
臣王世福。臣李義。臣安本固。臣張冰官。臣魯友時。臣
郭恩。臣鄭大捷。臣王承恩。臣文磐。臣李國印。臣李希
賢。臣李貴。臣王珂。臣張伯芹。臣宋資。臣蔣鐵。臣尹承
武。臣李世功。臣宋國賢。臣王永執。臣趙維藩。臣崔繼

儒。臣季得功。臣周選。臣曲中。臣張登瀛。臣王俊。臣張良棟。臣李惟屏。臣李伯。臣張世臣。臣高景時。臣李守仁。臣高仲先。臣張玉。臣張文材。臣楊繼祖。臣高傑。臣聞思聘。臣馮文學。臣趙良俊。臣戴升。臣鄒天福。臣劉得時。臣姜宇。臣于大用。臣劉文元。臣喻承功。臣辛雄。臣李景華。臣宋尚仁。臣李惟萇。臣于良輔。臣李世勳。臣李自泰。臣趙伯。臣郎惟忠。臣平聚賢。臣林添福。臣畢良富。臣褚萬金。臣劉守勳。臣王守臣。臣丁起鳳。臣樂世朝。臣王大厚。臣朱文良。臣趙廷用。臣袁承武。臣崔承祖。臣吳秉忠。臣胡一忠。臣劉相。臣陳府。臣高應。

選臣李維陽。臣趙廷璧。臣陳紹先。臣鄭朝隆。臣高夢松。臣陳體國。臣韓竒功。臣林國勳。臣孫國相。臣劉效忠。臣鄭洗。臣鄭選。臣金本重。臣周似松。臣高照。臣皮承德。當賞賚。於是上幸從大司馬議。賜李成梁歲加祿米一百石。遷廕子秩三級。復以勅勉勵之。加張佳胤太子太保。遷廕子秩一級。世襲。遷李松左司馬。遷廕子一級。世襲。亦如之。金錢幣帛皆有差。賜任天祚等秩一級。唐伯美等實秩一級。李平胡等銀二十兩。劉易從等秩一級。銀十五兩。張烱等十兩。復等秩如故。發馬價銀一萬。犒軍士有功勞者。

賜本兵張學顏。誥命王遴、陰武、卿、石星、金、錢、幣、帛。有
差。所司郎中皆賜十金。其五月。把兔兒聚兵養善木。
聲欲犯廣寧。語在伯彥務傳。頃之。同西虜以兒鄧。捲
臣台吉等。犯十方寺。不克去。犯長勝堡。又不克去。犯
靜遠堡。又不克去。犯榆林堡。漢兵斬首捕虜凡七級。
其閏九月。復與西虜以兒鄧、黃台吉、委正、以克、歹青、
額叅、委正、拱兔、台吉、阿民、台吉、煖兔、小歹青、并五路
男哥兒、馳呵、呵莫林、聲欲犯三岔河、西沙嶺、迤南、吳
家墳。有如泥瀾。卽入錦義清細河。是時銀燈亦以速
把亥故。犯遼瀋。大將軍李成梁行捕。至古路半那林。

去邊三百五十里。斬首一百有八級。語在銀燈傳。其
明年二月。犯前屯。裨將陳嘉寵。楊紹祖。斬首虜二級。
奪獲馬三十一騎。頃犯開原。裨將宿振武。斬首虜二
十一級。奪獲馬二十四騎。亡何。土蠻欲馳廣寧。購重
賞。於是把兔兒。抄花花大老思。卜兒亥。先聚黨以待。
以爲土蠻索漢重賞。必漢或不予。卽不予。則吾等從
中起。漢烏能智及此。而臺御史顧養謙。則先已詗得
其姦矣。乃以羽檄徵叅將黑雲龍。李惟藩。遊擊佟養
正。李文芹等兵。合營爲一二字陣。如故事。期二十五
日。皆從鎮邊堡出塞。二十七至可可毋林。去邊二百

餘里成梁躬帥諸將大戰數十合自辰至未不倦虜
皆騰山鑽林殆如蜚成梁復追亡逐北斬首凡九百
有二級中間得名豪酋長虎兒處把禿等凡二十四
級奪獲被虜男婦凡七十八口馬牛羊橐駝凡千四
百四十有奇死者亡算。盛甲臂手亡算。官軍亡徐良
臣李受等。凡二十四人。傷李寧。李興。查大受等。凡一
百七十八人。馬八百八十九騎。於是制置使王一鶚
奏捷。事下大司馬張佳胤問狀。故事。遼東報奏。遣
御史辨驗覈功。乃以御史王國弼往。先是。上有詔
凡遇報捷。巡按御史卽辨驗首級。十日內具奏。看覈

功次。一月內具奏陞賞者爲令。國弼旣至得其狀。如制置使御史中執法請。上幸賜李成梁廕子秩遷三級。遷王一鶚御史右丞兼右司馬。顧養謙御史右丞。金錢幣帛皆有差。陞任天祚。趙三聘俸一級。陞楊燮署都督僉事。加李寧。李成。查大受。孫守廉銜視總戎。他裨將皆受賞如初。犒軍發馬價五千。賜本兵張佳胤及蕭廩所司郎金有差。其明年四月復糾以兒鄧等聲欲犯遼瀋。其十月欲犯河東河西。頃之虜騎七八萬果從外邊。平山迤西黃佃子起營入清細河。李成梁尾至王謙屯。斬首一級。奪獲馬二騎。旦日

李寧。李有華。秦得貴。馳躡山斬首虜二級。虜騎還奔南台營。百總楊繼昂等馳開州屯。斬首二級。奪獲馬三頭。已奔戚家石家。滅家。大定。諸堡多所斬獲。語在以兒鄧傳。其明年正月。偕以兒鄧黃台吉。往硃砂埧。聲欲略遼瀋。於是裨將高良弼。提降夷乃六脫庫等。出硃砂埧。去邊三百餘里。道逢虜二千餘騎。於是降夷卜列奎。卜花。虎刺義。阿只卜。我兒革妹。脫庫。升奈。得勒卜賴。果羅太。阿寨。孩子。虎喇哈赤。奴才賴。挑戰。斬首虜七級。久之。降夷願得賞。每級賞五十兩。居亡何。虜騎三百。從周千住墩台兩空入。而以三千騎捕。

伏邊外。周千住兵威甚設。虜乃馳新舖可七里。殺黃
欽等十四人。鹵李忙漢等三人。牛驢二十五頭。燒徐
道廬舍四十三所。已。殺三里屯男子梁景松。李伯雲
等五人。燒李皮廬舍三所。牛三頭。已。殺埧河屯男子
劉敢生一人。鹵張小廝等五人。牛一十一頭。燒聶萬
良廬舍九所。於是備禦使古大相。及宿振武。追逐斬
首一級。奪獲馬四頭。是時李平胡。李寧。亦馳至三公
河上埧。屯黑窰石。虜已遠遁矣。其二月虜騎二千從
西平堡。平山台入。射我軍楊汝節等六人。傷楊春等
五人。鹵俞氏一人。備禦使楊紹先。逐急。虜乃退。旦日

李平胡。姚大節。李寧。李興。孫守廉。查大受。從鎮遠堡。樣台西空出邊。行至遼河九十餘里。鏖戰。斬首二十七級。其四月。聚卜言顧老撒。卜兒亥。煖兔。伯言兒。三岔河。迤西沙嶺。高平大小黑山。頃復犯清細河。聲欲相仇殺。於是鎮靜備守。使鄭應時。帥裨將佟加慶。楊紹先。嚴燧。火語。在黑石炭傳。其八月。副總戎楊變。使把總楊萬里。提降夷阿卜當。家丁江達子。捕伏養善木。去邊二百餘里。虜騎一百五十。挑戰。於是阿卜當。江達子。奮死不顧生。疾力戰。虜還走。阿卜當追逐。斬首二十級。奪獲馬二十一騎。我兵亡陳楠等二人。馬

一十五匹。傷王佐等九人。馬一十一匹。其九月。虜騎從石河口臺入。漢兵追逐。斬首五級。奪獲馬五頭。項之。把兔兒偕土蠻男卜彥。大會一克委正。及其叔父。燒海召力兔。三萬餘騎。聲欲略廣寧迤西。以雪速把亥之怨。其十月。虜騎至十餘萬。皆從黃佃子。黑松林。平山。馳大邊新臺入。圍鎮靖所。計欲分犯廣寧。錦義。是時虜營去廣寧城西不過四十里。止隔間山耳。而牽馬嶺。盤嶺。皆通道。於是副總戎李得全。提裨將王通。高良弼。馮文用。陳一諒。趙啓光。宋時和。李繼功等。兵五百人。備牽馬嶺。遊擊涂寬。提兵三百人。備盤嶺。

虜乃以其半走鎮夷沙河營。殺臺軍畢伏禮。夜不收李元得洪、旺等十人。馬九騎。營中弓矢鎗刀甚備。不可下。乃走柞頭山。奪王大等糗糧九十餘石。焚廬舍三十餘所。已走鐵場屯。殺吳天祿等三十八人。奪韓文學等糗糧一千二百餘石。焚吳志高等廬舍四百餘所。於是攻大靖堡。備禦使李都率軍餘衝鋒。斬首一級。奪獲馬一騎。虜竟深入程羊屯。已入凌河堡。已入孫寬屯所。犯四十三所。殺何住等凡四十六人。略王金等三十五人。奪糗糧三千餘石。燒王守祖等廬舍一千五百餘所。都御史顧養謙見爲虜騎逼近鎮

夷堡益發營兵八千人分隸諸將軍視緩急更調要
之皆備鎮夷堡以鎮夷堡故曩時殺速把亥仇地也
亡何虜先以四千餘騎馳牽馬嶺李得全益嚴軍令
令火炮火箭弓矢槍棍並發虜還走塔兒山止壁頃
復以精騎三千馳盤嶺涂寬亦禦之甚備然我軍死
楊仲金五人傷張尚恩一人馬十匹不及牽馬嶺得
以全爲勝矣虜於是走亦順溝瓦子谷旦日竟從小
鐵場屯分二枝以一枝攻驛以一枝屯南北山山皆
高直下視之可得堡虛實矢石直達城下李得全復
以火炮火箭擊兩山虜馬驚不能上遂犇而下

走我兵追逐。斬首虜凡二級。奪獲馬凡三騎。時二十
二日也。其後攻鎮夷堡。城上飛砂石。萬弩並發。如雨。
而下不可逃。軍中益擊刀斗。鳴金鼓。如是者三晝夜。
不交睫。虜於是度勢不可下。乃頓足嘆曰。嗟乎。事今
不可爲矣。阿父夙怨。豈終不可報乎。乃以二十四日
從大清堡。白土廠出塞。是時裨將李興。查大受等。見
賊未南下。皆提兵馳義州城。戚家堡。北援既至。則虜
已去矣。並止壁鷄冠山城。頃之。虜復攻山城。兵壯郭
景陽。以槍砲石矢。擊傷甚多。旦日攻昶家屯。擊傷亦
如之。虜始盡出邊。遊擊黑雲龍。提兵馳陳家莊。鏖戰。

奪獲馬三騎。虜亦殺我軍丁薛金等三人。馬六騎。傷二人。其二十七日。鎮撫使使裨將高良弼。李繼武。陳守義。王鳳鳴。吳大績。提兵從大寧堡。青水墩。出邊。尾虜後。擊虜情歸。乃以降夷卜向花爲耳目。旣行三日。至卜兒克力。去邊則已三百餘里矣。會大雪陰霧。於是帥官丁降夷李尚義。李尚順。卜向花等。大戰破之。斬首捕虜凡二十五級。奪獲馬三十七匹。盔甲皆八十。虜亦傷李尚義等八十八。馬四十八匹。是歲萬曆丁亥也。居五六年。癸巳冬。把兔兒。花大。抄花。約西虜小反。青。及五路哥兒。欲略清細河。其明年二月。馳舊

遼陽欲從關門迤東奴台入。其四月復引上言顧脫合赤老撒卜羅愛六千餘騎欲從關東雙台大小黑山入皆欲略攻尅堡。於是以兒鄧反青宰桑上言兔亦欲略錦義清細河賴李平胡等追逐斬首一十八級。奪獲被虜鄭大漢等一百七十一人馬八十四匹。語在炒花傳。其九月伯彥引一措委正把漢委正銀燈腦毛大等十萬餘騎聲欲犯廣寧。是時孫鑛爲置。置使李化龍爲臺御史董一元爲總戎皆大議以爲土蠻久物故而其子卜彥台周嗣其種類雖多而強乎。然大舉有時而獨患苦把兔與炒花耳。且所居在

舊遼陽以北。適兩河之中。東可犯遼瀋。西可犯廣寧。南可犯海蓋。以故把兔兒。春夏則擁衆以抄略。秋冬則導北虜。闖入漢關。常自大言曰。我先剗爾眼耳。然後剖爾心腸。眼目者。華言墩台也。心腸者。華言城堡也。其芥視全遼類如此。於是度把兔兒不過萬餘騎。以爲誠破東虜。則西虜當不戰而走也。臺御史乃與總戎刑白馬以盟。必滅此而後朝食。其十月。虜乃從小周台深入吳家墳。是時西虜已近邊。有言宜擊東虜者。大將軍董一元。以爲其下環海多潮溝。盛蘆葦。我兵不得成列。卽幸而戰勝。殺傷大相當。卽西虜一

日卒然有急。將何以待之。而况虜見我兵扼其歸路。必堅壁弗出。居一二日。有如西虜深至右屯。勢必合。而我兵氣已奪。可不戰而自潰矣。於是以兵匿鎮武堡。空其營盤。亡何。虜果馳營盤。營盤空無人。虜皆鼓掌笑。以爲漢兵誠畏我遠匿。乃率諸虜騎深入。過者未大半。我師僮卒從中起。循墻而進。虜皆大驚。懾鬼疆扶持手足。搏戰。我師自午至酉。不倦。亡何。虜益不能支。倒戈董一元。追逐三十餘里。奪回被鹵人畜。復追逐四十餘里。至白沙塢。斬首捕虜凡四百一十六級。橐駝馬牛羊以千數。是時酋首伯言兒。中流矢死。

把兔兒亦被傷。虜以故愈急。所不死者。皆棄甲冑。按
轡空馬而逃。於是馬牛羊橐駝及鐵鍋羶帽積若崇
丘。是夜虜奔馳如狂。天明然後駐馬聚哭。卽風聲鶴
淚。虜皆以爲晉兵至矣。非復曩時阿虜也。明日西虜
果至右屯。深入吳家墳。見墩軍。問把兔兒安在。墩軍
具以實告。於是驅橐駝走廣寧平虜。遂奔團營。由此
攻右屯。五日不下而去。先是伯言兒在胡中最僇悍。
常逮慶雲守備。使王鳳翔出邊。罷市賞。今一旦物故。
胡中如失左右手。於是把兔兒及卜言台周瓜兔兒。
反青。义哈兒復聚兵。期正月略遼瀋東西。董一元廼

先伐其謀。將兵至拴道。去邊四百餘里。把兔兒則以鎮武堡傷重。竟物故矣。我師斬卜勒亥。汪那呵等首。凡一百一十級。獲生口一十人。語在卜言台周傳。於是臺御史李化龍奏捷。上有特諭。諭中貴人張誠於會極門傳示。昨日内閣揭奏虜賊入犯遼東。總兵董一元等督率將士。扼險露宿野地。臨陣奮勇。斬首至五百餘級。駝馬夷器近千。是皆仰仗祖宗威靈。神武布昭。鎮撫效勞。勛可加尚。你部裡便馬上差人傳示該鎮文武同心。僇力慎加防禦。速將有功人員。即便查報。先行慰勞。還着巡按御史上緊查勘奏

聞立限與他故諭頃之。發馬價二萬兩。前去賞勞。以
示獎勸。居月餘。御史宋興祖以勘功疏。上事下大
司馬石星問狀。故事。輔臣及兵科。雖有大勲勞。不叙。
以故大學士趙志臯。張位。陳于陛。沈一貫。及給諫吳
文粹。皆不敢槩論。上迺從大司馬議。賜董一元
陞左都督。加太子太保。廕一子指揮。世襲。陞孫鑛御
史右丞。廕一子太學。陞李化龍右司馬。廕一子執金
吾千戶。世襲。金錢幣帛有差。是役也。叅政臣王邦俊。
以從征。賜爵二級。金三十兩。表裡二之。郎中臣劉三
才。以轉餉布政。臣郭性之。叅政臣梁雲龍。兵備臣蔡

可賢以應援皆 賜金三十兩。總戎臣李平胡。賜陞

左都督。仍陞實職一級。副總戎臣張世爵。 賜陞都

督同知。仍陞祖職一級。皆 賜金五十兩。表裡二之。

叅將臣祖承訓。賜都督僉事。授副總戎。臣方時春。賜

秩視副總戎。遊擊臣張奇功。臣曹文煥。賜秩視叅將。

遊擊臣董用威。賜除罪。臣涂寬。賜復祖職。臣李如梧。

賜銜視叅將。臣王德義。加僉書秩。臣王維真。復祖職。

他皆賜金錢如初。賜本兵石星。加少保。兼太子太保。

金五十兩。紵絲飛魚衣一套。李禎銀三十兩。表裡二

之。所司郎中金十兩。他皆八兩。始速把亥。均時。胡中

皆以子年少。亡能爲。欲從瓜兔兒。卒之枕戈泣血。常擁十萬騎。出萬死。不顧一生。惓惓欲報父仇。仇卒不可報。竟死鎮武堡。君子於是乎謂把兔兒於鎮夷堡。乃蚤自得解免。不相從阿父於地下也。

讚曰

怨毒之於人甚矣哉。王者尚不能行之於臣下。而况夷虜乎。余觀卜言兔把兔兒欲報鎮夷堡之役。未嘗不悲其志。及見藉兵西虜。以甘心於遼。又未嘗不恠廣寧東西間。迺亦甘心於虜哉。卒之董將軍出塞三千餘里。把兔兒身死人手。爲遼西快。則又未嘗不爽。

武王金
趙抃死傳
四一
三六九

然自失矣。宜廟議請比曹義、焦禮、施聚封爵事。而稱董將軍當伯也。

炒花花大列傳

炒花。虎喇哈赤季子也。嘉靖中。炒花最雄弱。黃勇常亡。抵於穹廬。易之。竟歸。速把亥。久之。速把亥略廣寧。炒花輒執干戈。往從矣。隆慶初。復從酋長黑孛羅等。萬餘騎。略河東。稍稍稱強。明年。速把亥。反青。馳鵬背山。使者十餘輩。約炒花。炒花至。然後入丁字泊。居一二年。遂與土蠻相仇。殺於是。速把亥委正。炒花聚兵羊腸河。佯言擊土蠻。廼欲患苦我河東遼陽間。其明年。上卽位矣。插漢兒。及董狐狸。皆聚兵襖伏。往毛挨兔。已。捕伏鵬背山。去邊七十里。常使數十騎。往來。

詞塞上。因誘漢兵計欲撤我東備。悉以衆攻瀋陽鐵嶺。總戎李成梁擊破之。斬首捕虜凡五十七級。奪獲馬凡二百有七騎。頃之大會土蠻營。聲欲略廣寧。錦義塞。漢使蒼頭軍李平胡視中遼河。去邊一百餘里。是時虜騎皆精兵。李成梁迺欲先奪其壘以伐其謀。於是出塞直擣虜壘。擊破之。斬首凡三十三級。其明年春。虜見大兵至。迺中分虜。而以半東行以窺遼瀋。以半西伏以襲錦義。語在速把亥傳。是年冬。虜以略錦義不遂。復欲入大小黑山。開原鐵嶺。瀋陽之間。其明年炒花出所鹵通事竇聰至塞。已大會黃台吉。黑

石炭。上言台周。以兒鄧堵刺兒。煖兔。拱兔。捲勞亥。二
萬餘騎。從平虜堡南靜九臺空入。副總戎曹籃追逐
至國公寨。斬首捕虜凡一十一級。奪獲馬凡四十八
騎。虜乃棄鈎杆。與漢兵相持。頃之。叅將唐朴。備禦黃
都。楊四德。馮文弼。孔東儒。蔣國泰。自北而至。副總戎
傅廷勳。遊擊王維屏。備禦丁倣。守備郎官。自東而至。
於是李成梁。見爲榆林。舖地形。於馳逐不便。廼移壁
平虜堡。而以傅廷勳等兵居瀋陽城外。列車下營。以
示有備。亡何。虜果馳瀋陽營中。砲鳴如雷。虜乃犇西
北高墩。成梁明而習於計。度虜必從故道出塞。廼帥

輕銳之卒六千人。而以三千人爲一陣。陣大率類一二字。居左右如列眉。而又四千人爲一大營。營居中。於是將軍令曰。兩軍將進戰。先期中軍擊鼓。一字陣軍聞鼓聲。卽魚鱗而入。然後二字陣軍接踵。火炮火箭火鎗俱發。是時虜亦擁萬餘騎。約長二十餘里。列左右如漢兵。旣至堡南八里。成梁乃令營中擊鼓。傳發諸軍。皆鼓行而前。先以火炮擊傷甚多。成梁親提兵大戰。自己至未。殊疾力。把總許繼恩挽戰車尾。虜後砲火震天。虜乃棄輜重反踵走。成梁追亡逐北。至河溝。水深十餘丈。馬牛橐駝盡傾跌。充盈河溝十餘

里我兵乘勝渡河擊殺以千數會暮取浮屍斬首凡二百有七級奪獲橐駝馬牛羊器械亡算我官軍死者二百七十餘人其明年春炒花偕土蠻速把亥欲雪平虜堡之憤乃使精騎往來旁近塞訶邊先是制置使楊兆總戎李成梁度虜卽至必以二三月入塞當先使零騎捕伏塞下迺簡丁夜備東西塞亡何虜使至兵起出虜使不意不暇走斬首一十六級自是之後虜益羨西虜及海西王台貢賞其明年聚兵二萬餘騎略海西是時速把亥炒花哈屯委正歹青黃台吉堵刺兒莽忽大董狐狸長昂長兔實志在犯全

遼見東隅逢火精明不可入。廼佯示北遼以緩我兵。頃之。倉卒從威遠堡突入。大將軍備兵甚盛。旋追逐。出邊虜之傷石矢者亡慮千餘人。是歲萬曆丙子也。其戊寅春正月。黑石炭歹青哈屯炒花速把亥七萬餘騎聚捨刺毋林。詳言搶王台。頃之。廼馳遼陽。潘陽開原。挾求貢賞。詳言欲人犯誘廣寧兵西防。因移壁劈山。於是李成梁欲先伐其謀。乃帥遊擊陶承學。叅將姚天與等。期十九日直擣劈山。去邊二百餘里。李平胡望見穹廬皆紅纓。其南道可擊。亟趨諸軍進戰。破之。斬首捕虜凡四百二十五級。奪獲馬四百七十。

七頭橐駝二十二頭弓矢器械亡算自是之後炒花
及哈屯反青速把亥等益擁精騎少者一二千多者
五六千人皆披帶盔甲張弓露刃到開原要賞因公
行劫略先是去年六月入市頃之卽略軍餘七人牛
十九頭殺餘丁三人七月略餘丁九人牛五頭十月
殺餘丁五人略軍餘四人馬牛驢三頭其明年炒花
速把亥兒漢煖兔老撒卜兒亥恍忽太三萬餘騎從
東昌堡亂柴口入深至耀州裨將秦得倚等追逐斬
首二級奪獲馬一十五頭已大會黃台吉於遼河成
梁躬提兵衝鋒大戰圍山擊破之斬兒度等首虜凡

八百七十九級奪獲馬一千二百四十八頭橐駝十
六頭盔甲器械亡算虜亦射我兵蔡繼祖等一百四
十四人馬二百八十八匹於是制置使梁夢龍以捷
聞上祭告郊廟賜金錢幣帛有差先是部夷阿
都亥等千餘人亡抵養加奴已炒花覺使使者索之
於是得把漢那木賴執而殺之阿都亥懼誅易名我
兔亡歸漢漢塞執而僇之頃給諫及御史安九域請
論如法其明年益聚黨略瀋陽其明年偕土蠻深入
凌河殺略甚多其明年炒花與克石炭煖兔伯言以
曩時所鹵略不如願聚黨二萬餘騎復欲略遼瀋開

原其明年春速把亥伏誅炒花廼與其姪老撒卜兒
愛悲憤益亡聊日莫思欲一逞於漢於是亟走土蠻
罕專以報仇爲務矣是歲萬曆壬午也其明年春逞
加奴仰加奴及王台男虎兒罕赤亦相仇殺於是炒
花把兔兒花大老撒卜兒愛卜言顧並上馬誓竭力
以報鎮夷堡之役廣寧錦義之間蕭然苦兵矣頃之
粟馬遼河其夏略細河及關門東西直擣臥牛山復
馳鈺窪空臺東小臺漢兵追逐出邊亡何擊馬門關
鹵我兵隨來等一十餘人裨將李得全轉戰奪獲六
人斬首虜一級漢兵傷八人漢馬死者十匹其明年

春同西虜以兒鄧攻永安堡。劉登泰斬首七級。攻三山營。遊擊陳朝陞斬首一級。攻寨兒山。叅將楊燮斬首二級。攻椴木衝。備禦蔣國光斬首五級。攻大寧堡。叅將熊朝臣斬首二級。其夏粟馬舊遼陽。是時大小打刺漢委正黃台吉攻城堡急。銀燈把兔兒亦粟馬養善木志皆在窺河東。其明年秋大會以兒鄧阿民台吉小友青及五路男哥兒等馳呵呵莫林聲欲犯三岔河西沙嶺迤南吳家墳爲速把亥報仇。其明年春炒花把兔兒花大老思卜兒亥聚黨十餘萬止壁阿亥塌期土蠻並馳關市下購大賞不則卽連虜騎。

入塞。頃之。炒花使使者索速把亥盛甲諸什物。必欲得一事以爲遺念。成梁廼先提兵出呵呵毋林。去邊二百餘里。虜望見漢兵至。皆披甲兵上馬。接戰大破之。悉犇逃。成梁乘勝行捕。斬首二十四級。奪獲被鹵湯住等二十二。人。幼夷七十八人。其二月。復五十餘騎入三山營。遊擊陳加寵追逐。斬首二級。奪獲馬三十一頭。頃之。三百餘騎復入永寧堡。追逐。斬首二十級。奪獲馬二十四頭。其四月。聚黨遼河。聲欲略瀋陽。其十一月。大會西虜一克委正土妹哈不趨台吉。捨刺大以兒鄧。東南視老河。河淺。略河東。不則直走河。

西是時黃台吉及黑石炭銀燈一克及青把亥及青一克大成把亥大成抽口兒大小委正揜臣台吉並擁精騎七八萬粟馬烏峯塔待炒花炒花乃使使者哈刺亥孛孛戶言諸虜皆從平山迤西黃佃子起兵入錦義清細河炒花以躬欲到關市有他請未從頃之炒花竟帥諸虜騎從鎮夷堡入乃使零騎攻城堡堡備兵甚固無所獲漢兵斬首捕虜凡四十二級奪獲馬六十騎上幸從左司馬楊俊民議賜李成梁顧養謙金二十兩表裡二之紀錄劉易從賜李平胡金十五兩李得全十兩涂寬五兩其明年二月

諸虜聲欲犯廣寧。成梁先提兵馳卜刺阿兔。出邊五百餘里。會虜騎亦預徙亡所得。其十月。炒花把兔兒欲入廣寧。以兒鄧得兒鄧台吉。青把都。欲入錦義。上彥台王哥兒。聚黨黃伯子。黑松林。平山。去邊二十餘里。是時精騎十餘萬。揚揚欲馳鎮夷堡。以報夙昔之怨。語在把兔兒傳。居五六年癸巳。炒花益憤。漢殺我兵馬甚多。於是擁二千餘騎。從長勇堡。馬門。沙塌台。入禪將崔吉。追逐。斬首虜九級。奪獲馬二十八頭。其五月。佯爲橐弓矢還歸。以示漢不疑。頃之。復犯錦義。其十二月。犯清細河。其明年四月。炒花把兔兒。上言。

顧脫合赤老撒卜兒愛提萬餘騎入關東雙台大小黑山擊城堡聲欲略廣寧遼瀋漢使諜者訶之諸虜皆粟馬黑山迤北錦塔下頃之虜以二千餘騎從莽撞湖直擣李高麗韓家路總戎尤繼先出兵鏖戰自午至未斬首虜凡一十八級奪獲馬八十四頭被鹵男婦鄭大漢等一百七十一人牛驢二百二十三頭陣亡把總李世功李守仁二人官軍張國付等四十六人傷丁尤彪等四十八人漢馬死者五十三頭餘黨悉從野猪湖北空台出邊其七月炒花把兔兒卜言顧花大老撒卜兒艾煖兔伯言兒哈喇把拜阻舊

遼陽。於是犯鎮武。錦義總戎董一元長驅二千餘里。斬首捕虜凡四百餘計。橐駝馬牛羊以千數。語在把兔兒傳。其丙申春。炒花以五路哥兒以兒鄧約謀欲引三萬騎寇鈔河東。炒花親速把亥弟始以把兔兒強橫行塞北。既有年。今速把亥把兔兒先後皆伏誅死。而炒花得無恙。炒花一名炒哈。一名炒花。一名抄花。曩者擁兵馳關市下。關吏問何爲。曰吾欲索阿兄速把亥盔甲及什物。庶幾得一事以爲遺念也。

花大親速把亥妹夫也。爲泰寧衛酋長。癸酉秋。董忽力常欵喜峯口。挾重賞殺人。頃花大伯顏兀亦效之。

而起也。爲患桃林。居一二年。聚酋長治兵。聲欲略錦
義。其庚辰秋。克石炭。大小委正。反青。黃台吉。炒戶兒。
以兒。鄧。額。參。委。正。程。把。都。拱。兔。煖。兔。裝。兔。捨。勞。黃。花。
台吉。逞吉兒。把拜。宰桑。委正。皆止壁半那林。可兒箇。
待土蠻。花大。廼使市夷董吉那阿孛。詢得其狀。於是
驅馬馳虜中。而土蠻則已至老河矣。虜中相與謀曰。
從此入新白堡。錦義。清細河。可乎。頃之。虜騎十餘萬。
並至邊外青山口。大凌河。於是大將軍李成梁備廣
寧。以扼清細河。鎮靜關之衝。而又恐虜度我有備。或
走寧前。因窺我開瀋。皆不可知。益使遊擊將軍秦得

倚佐寧前兵。其明年春。土蠻及黃台吉。克石炭等。聚兵略廣寧。花大使夷使火力紅道來告。其秋復與北虜以兒鄧等二萬餘騎。粟馬遼河。聲欲略遼瀋。是時梁夢龍爲制置使。周詠爲臺御史。亟使叅將李平胡。李得全。孫守廉等備遼瀋。至備亡何。虜以二萬餘騎從榆林堡上永台北空入。於是備禦使馬世龍提孫守廉等兵馳大澤。虜廼使八百騎挑戰。漢兵殊疾力。多所殺略。虜還歸老營。復增兵迎敵。而副總戎秦得倚。及備禦郎梅兵亦至。大相當。虜縱兵擊蒲河關廂。漢出兵追逐。至青堆台。漸解散。而會李得全。王維貞。

兵合營。並馳丁家屯。斬首虜六級。奪獲馬十五騎。我軍亡四人。傷五人。漢馬死者一十七騎。虜度不可敵。去。久之。憤曩時入關。秋毫無所利。於是速把亥炒花老思卜兒愛等。復會煖兔伯言等。略遼陽。迺先使使者窺邊。有如邊吏嚴。弗可犯。卽略廣寧東西義州。先是襖兒兔之捷。斬捕甚多。虜乃糾東西虜攻長安堡。副將軍曹箠擊破之。制置使竊必虜騎復再至。以故塞上燻火。精明虜以故不敢入。其明年壬午。速把亥旣伏誅。花大索其屍。馱至營中。伏屍而哭。極哀。於是布帛練之。葬於塔母戶渡。哈屯卽以墓屬花大。及

其子把兔兒守之。語在速把亥傳。其明年春。花大炒花。把兔兒老撒卜兒愛卜言。顧哄花大誓衆。聲欲略遼河。其秋果至遼河。頃擊清細河。及關門東西城堡。語在把兔兒傳。其明年秋。把兔兒及老撒卜兒亥。怨花大。中金夷流矢。聚兵養善木。聲欲略遼瀋海州。其明年春。虜騎六千馳舊遼陽。其明年粟馬恰亥額力素。聲欲從舊遼陽養善木入塞。是時西虜欲從無冰者馳。東虜欲從有冰者馳。猶豫久未決。其明年春。花大與西虜以兒鄧等逐遼河水草。已決筴待秋高馬肥。然後馳廣寧。於是大將軍欲先伐其謀。急使遊擊

將軍韓元功。徵治丁字泊浮橋。出諸虜不意。期三月十八日出師。既行至打大。去邊可一百五十餘里。是時制置使李松。及備兵使任天祚。王緘。親臨兵。趨諸軍。諸軍勇氣益百倍。先登擊破之。斬捨征孛來。乞搭把失等首。凡八百二十四級。奪獲馬凡五百九十四頭。盔甲器械亡算。亡降夷羊羔兒。卜兒寨等凡十名。傷蒼頭軍徐行謙等。凡二百一十六人。漢馬死者凡六百三十九頭。其夏牧馬遼河。頃與大小打刺漢。委正黃台吉等。聚六萬餘騎。略寧遠。久之。偕西虜以兒鄧。搶臣台吉。五路男哥哥。聲欲略討來兔十方寺。已

馳呵呵毋林犯三岔河西沙嶺迤南吳家墳副將軍
李平胡提兵至古路半那林去邊三百五十餘里擊
破之斬卜兒忒革把兔虎刺赤卜言兀捨正等首一
百有八級。盔甲器械亡算。亡降夷阿寨一人。傷蒼頭
軍九人。漢馬死者八十八匹。已。炒花花大把兔兒使
使者把刺哈視河。河淺犯河東遼瀋開原。不則直擣
廣寧。使者既行至三塔谷。爲漢所逮。其明年三月。偕
把兔兒炒花老思卜兒亥八萬餘騎。馳阿亥塢。成梁
先出師。直擣呵呵毋林。去邊二百餘里。斬虎兒處把
禿等首九百有。二級。奪獲男婦七十八人。馬一千三

百一十三頭。盛甲器械亡算。其夏粟馬遼河。聲欲略遼瀋。以報疇昔之役。其冬。抄花。花大使哈刺那亥。孛孛戶。叩關稱大小委正等。欲入清細河。錦義以欲有所關白故也。其已丑春。炒花。把兔兒。花大臨邊視道里。大將軍李成梁提兵至卜刺阿兔。去邊五百餘里。虜騎先已遁去。亡所獲其癸巳冬。花大抄花。把兔兒等。略清細河。其明年春。復連卜言顧。卜兒艾。煖兔。伯言兒。哈喇。把拜。二萬餘騎。馳舊遼陽。頃之。從鎮靜堡。逸東奴台入半邊山。見邊備嚴。花大遂引兵去。漢亦引兵罷。其後二年。花大使弟孝兒。備款塞。請馬市。願

爲漢保塞。因好爲誓曰。所不如約。有如此日。始鎮靜
堡之捷。遊擊將軍李寧。以金夷傷花大左臉。頃臍脛
中流矢。頗聞不死。竟抱馬而鼠竄乎。

讚曰

抄花花大提桴鼓。從速把亥把兔兒者數矣。兩曾獨
不聞伏誅。何哉。鎮夷之捷。花大索屍而哭。極哀。以所
聞守塚瞭山。爲速把亥計至高。余獨惜其不知量。迺
勞苦我邊吏。不旣深乎。徃闕氏謂冒頓曰。今得漢地。
單于終非能居之。且漢主有神。由此觀之。兩曾安柰
邊吏何也。

老撒卜兒艾列傳

老撒卜兒艾。皆答補子也。癸未春。長昂發難。計將入關。假兵于兀魯思罕。老撒撒等。衆心不從。己長昂叩關請罪。老酋北面。於塞上晏如矣。至己卯。與卜兒艾引兵從速把亥。速把亥。親叔父行也。於是乎有遼河之役。大將軍李成梁。鏖戰于圍山。大破之。斬首虜八百七十有九級。奪獲馬凡一千二百四十八匹。佗駝凡十六頭。語在速把亥傳。居歲餘辛巳。土蠻復引兵至。而與速把亥。花大。老撒卜兒艾大會。會控弦之士。亾慮二萬人。聲欲寇鈔我遼瀋之間。已竟走榆林堡。

上永台入塞。塞士如林。追逐至蒲河。斬首六級。奪獲馬十五匹。虜度弗可敵。復走故道出塞。頃之。撒等憤往來塞上。甚勞苦。秋毫亾所利益。鞅鞅不自得。乃與爰兔伯言約。約復入遼陽。如遼陽有備。則提兵入廣寧。義州塞。市夷來告。其明年速把亥。卜兒亥。遂伏誅。老撒欲報之怨。而輒從炒花。因與土蠻議入塞。大將軍李成梁習於兵。聞得謀者。言曰。撒等奔北。餘魂偷生塞外。汎汎乎若不繫之舟。此屬安能復逞哉。計莫若乘虜隙伐之。蕩滅此屬。毋歲歲爲我患。乃以四月初日。提兵出太清堡。晝夜馳大青山。則去邊已百三

十里矣。我師捕伏山林。而虜以九騎巡山。見我師。盡還走。成梁遣裨將李寧、李興、李有華、吳効、忠等擁蒼頭軍五十人。跳驅而前。斬首虜五級。生獲額孫兔一口。是年冬。仰加奴借龍兔以兒鄧及老撒等兵攻虎兒罕。或言寇我開原塞。已那林孛羅等又借兵鈔南關而會阿台。亦欲合兵爲其父王杲報怨。明年春。大將軍成梁復出塞百餘里。襲阿台巢。大破之。斬首捕虜二千三百三十三級。奪獲器械亾筭。語在阿台傳。是時卜言台周又九合以兒鄧及老撒等聲欲寇我遼瀋。其夏把兔兒則連老撒兵又起。欲寇鈔我清細。

河紛紛藉藉。邊外皆報怨之虜。虜騎直走臥牛山。至缸窰。分道而伏。我裨將李平胡、孫守廉亦捕伏正安堡。三角山。亾何虜竟圍我鎮靜堡。賴馬門。及前臺尖山兵夾攻。而以督臣臨兵。勇氣萬倍。虜始解散。明年夏。虜騎老撒復從把兔兒聲欲寇我十方寺。而適水深。兵馬不能渡。其秋老撒卜兒艾從抄花等大鈔我沙嶺。吳家墳。語在灰正傳。其明年春。老撒復從把兔兒等。以市賞要挾我。不則寇我遼瀋。是時土蠻爲政。撒無權矣。語在一克灰正傳。其明年夏。虜騎又寇我沙嶺。高平。大小黑山。於是虜騎歲歲往三岔河。我無

須臾解甲也。甲午夏，炒花把兔兒卜言，願脫合赤卜羅愛等，復約老撒起寇我奴臺。大小黑山居頃之虜騎萬餘，馳綿塔休舍，而青雲臺知虜騎至，鳴砲。於是諸閱視兵馬，分道而馳救。虜乃以二千騎走鎮靜堡，莽撞湖，直擣李高麗韓家路。是時大將軍尤繼先與備兵使馮時泰定軍令，令逗遛弗前。及下馬爭首級者斬。我師前接戰，至日晏，擊破之，斬首虜一十八級，奪獲被鹵男婦一百七十一人，馬八十四匹，牛騾二百二十三頭。漢亦亾把總二人，卒四十六人，馬五十三匹，傷四十八人。其秋，加以花大煖兔伯言兒哈喇

把拜。卜兒艾等率二萬餘騎馳舊遼陽。大言曰。廣寧多金錢。士卒寡。吾擁衆攻之。直旦莫下。居一二日。胡騎自奴臺入。休舍東岳廟。望見邊嚴肅。不戰而還。勞費已甚。而黨亦携矣。

讚曰

老撒卜兒艾終始欲爲速把亥報怨。其志豈不悲哉。卒之把兔兒等相繼授首。而怨竟不可報也。悲夫。我國家大一統。九邊結離。而稱臣妾。胡撒何獨倔强。由此觀之。酋回自貽伊戚也。不自艾而怨塞上。塞上何尤。